



UPA 2017/029-01

26-04-2017

Inatsisartut ataatsimiittarfianni ataatsimiinnerit, siumut aalajangersarneqareersumik annertussusilimmik, radiukkut aallakaatinneqartarnissaannik KNR-ip pisussaaffilerneqarnissaanik sulissuteqaqqullugit Naalakkersuisut peqquneqarnissaannik Inatsisartut aalajangiiffisassaattut siunnersuut.
(Siulittaasoqarfimmut ilaasortat)

Inatsisartut ataatsimiittarneri toqqaannartumik radiukkut ingerlanneqartareerlutik inuttaasunillu tamanit tusarnaarneqarsiinnaareerlutik 2016 upernaakkut ataatsimiinnermiit innuttaasunit malinnaaffigineqarsinnaajunnaarput.

Soorunami tupinnangitsumik inuppassuit tamanna arlalitsigut naammangittaalliuutigalugu maannamut qisuariaqarfigisarpaat.

Tamanillumi ilisimaneqarpoq radiukkut inatsisartut ataatsimiinnerisa aallakaatinneqartarnerat taamanikkut nunatta karsianut immikkut aningaasartuutaanngikkaluarluni KNR-imiit annerusumik ajornartorsiutitaqanngitsumik ingerlanneqartartoq.

Tassami Nunatta karsia, tassalu inuiaqatigiit kalaallit, KNR-ip ingerlanneqarneranut ukiut tamaasa 70 mio kr-it pallillugit aningaasaliisarpoq.

Taamaattumik soorlu aamma inatsisartut siulittaasuata tunngavilersuutimini oqaatigingaa; innuttaasut qinikkat aqqutigalugit oqartussaaqataanerat tunngavigalugu naalakkersuinikkut ingerlatseriaatsitsinnut inatsisiliortussatut qinikkat oqallinnerisa malinnaavigisinnaanissaannut innuttaasut periarfissaqarnissaat aallaaviulluinnartoq.

Tamannalumi aamma qinikkanik, naalakkersuinikkut suliniaqatigiiffinnik partiinik naalakkersuinikkullu ingerlatsinermik ingerlanneqartumik innuttaasut naliliisinnaanissaannut tunngaviit ilagaat.

Tamatta nalunngilarput aamma pingaartittuaannarput inuit tamat oqartussaaqataanerisa nukittorsarneqarnissaat.

Taamaammatt Partii Naleqqamiit piumasaraarput, inatsisartut ataatsimiittarnerisa radiukkut aallakaatinneqartarnerisa ingerlateqqinneqarnissaat Naalakkersuisut piaartumik sulissutigissangaat. Aamma isumaqarpugut KNR-ip suliassaq piaartumik tigorusunngippagu – periarfissat allat misissorneqartariaqartut.

Taama oqaaseqarluta siunnersuutip aappassanneeraneqannginnerani ataatsimiititaliami susassaqartumi suliarineqassasoq.